

Kálag e Hibru Ndibned n kálag

Mod awě atelé enén kálag antel chó áwéd bad bé Krısto nlém a abum áyāl e metake nıme bó donje á bad békúdé'áá adúbe áde béndūbēē Yesuε. Alúmté áte nén aá melě nıme Yesuε ápééné métómé melě nıme ménsēbē abé. Alúmté-'ε áte ámpē nén aá béēhūntē nlém nén bán Dyōb déelónédte akag áde ábágé. A melě mé'sō nıme Dyōb démwēē ne ábē bad mbwiined ne Mosεε, beprise bóó bébágé'áá Dyōb mendε á nló nı bad. Boη bóob, Yesuε mó adé mod a tınté a bad ne Dyōb abé-'ε prise ambáámbáa awe atómé bekal bé'dáádəη bé' bóód, atóm ángel, atóm-mε káəηne Mosεε, áyāle eche yāl chən chóó ámbéé née mendε, ngen póg ne ngen ésyāəl. Hōm áde ádíí Átómténé Asáη tómaa hōm áde beprise bé' bóód bébágé'áá mendε á nló nı bad, mendε nıme ábágé-'ε mékwógnédé.

Nkabtéd n kálag

Krıtəə mó alúmté bad ngáne Dyōb ákóó abé 1.1-

3

Krıtəə atómé ángel 1.4-2.18

Krıtəə atómé Mosεε bó Josua 3.1-4.13

Krıtəə adé prise awě atómé beprise bésyāəl á mbyaa nıme Levi 4.14-7.28

Melě nıme Krıtəə nıtómé melě mé'sō 8.1-9.28

Mendε nıme Krıtəə ábágé nıtómé mendε nıme beprise bébágé'áá bóód 10.1-39

Adúbe atómé chōm ésyāəl 11.1-12.29

Abé áde áwógte Dyōb menyınge 13.1-19

Mekáne mé asóg 13.20-21
Melenten mé asóg 13.22-25

Dyöb áhóbé wée bad mbwiined ne Mwän

¹ Se' bód, Dyöb dénhōb wée ábēd betaa, anláá bekal bé'dáédəŋ mam áláa bó. Anhób áwāb ngen ne ngen, ábenléd-te menzii híin áhób áwāb. ² Boŋ á e'pun bé asóg hén, ahóbe wée syánē, álāŋgē awe Mwän mam áláa syánē. Wée ane Mwän dōo Dyöb ápóo boŋ áhəgé' nkoŋ mí mín ne ní sé. Mó-'aá Dyöb átíidé aá mó awóo nhəgtéd rísyāā. ³ Ane mwän móo adé e'kin-áte bé ehúmé é Dyöb, mó-'aá alúnte syánē ngáne Dyöb ákóo abé. Adíi melemlen née Dyöb-pe adíi. Ngíne e eyale é nsəl échē ane Mwän ebélé mekan mésyāāl mékag á'sō ngáne métəŋgéné abé. Ahúd áde áhúdé syánē á mbéb-te, abelé syánē moosyāal desáá. Ambíd e nê, andyēé Dyöb á Ngum é ekáá é mbáá ádyōb.

Mwän a Dyöb atómé ángel

⁴ Né-ó, Mwän a Dyöb atómé ángel. Melemlen nê dōo dīn áde Dyöb áchəgé mó aá, "Mwän" atómé dīn ádāb á "áŋgel." ⁵ Dyöb déēhōbēē wée ángel ké póg mbēd aá, "Edíi awem Mwän, chíi, ndíi sós." Dyöb déēhōbē' aá wée ángel ké póg aá, "Mēbē Sáá, mó-'e abé awem Mwän."

⁶ Boŋ Dyöb ádēhób aá mólōme' awe Mwän a'só á nkōŋsé-te, anhób ámpē aá, "Ángel échēm ésyāāl étəŋgéné mó edúbé abe."

⁷ Anhób təŋgene ángel pen aá, "Abelé éche ángel édé née epub.

Echê Angel éche édé ábē bembæledε,
 abélé édii née muú míme ríchodne’.”

8 Bonj Dyöb dénhōb tâηγεne Mwān aá,

“A-Dyöb,

wεékamlén á ngíndé ne á ngíndé.

Wεékamlén ábōη bad nyaa echē etāηγένé.

9 Edáθ mam míme métāηγένé, ékō̄-’ε mam míme
 mééboo.

Né-’aá ákás bonj Dyöb, ádonj Dyöb,

áp̄wēd wε ábē etógnén tómaa baásyā̄l ábe
 nyáābō̄ nyédé,

áp̄wēd-τε wε ábē menyīηγε tómaa baásyā̄l ábe
 nyáābō̄ nyédé.”

10 Dyöb áhóbé ámpē aá,

“A-Sāη wε-εé ehágé nkōηsé se á mbooted,

nkonj mí mín-νε ndii abwóg áde éhágne échonj ekáá.

11 Abē bwēm é’syā̄l bépě á asóg, bonj wε pen wεébē
 abé ne abé.

Abē bwēm é’syā̄l bémaa áse née mbóté.

12 Wεényag bó áte ngáne bényagεé mbóté,

wεéhəηlén-νε bó áte ngáne béhəηlanné mbóté.

Bonj wε pen wēbē ebé melemlem, ádōη alongé-’ε
 déewóηgé asóg.”

13 Dyöb déēlāηgēē ángel ké póg mbēd aá,

“Dyεé με é ekáá émbáá hén

káāη ne á póndé eche mébenlé

bonj ékōgtéd ábōη bad bé ekōyí ámin ne mekuu.”

14 Cheé-ō ángel édii? Edii e’dáádəη ábē é’benle
 Dyöb. Dyöb álóme-’ε bó áwóηγεν bad ábe békūd
 e’sóosonj.

2

¹ Né-óó ngáne débíí nímén mekan, detəŋgéné kéchéé éche déwógé nlém asum áyāl ábəl bon deépānē' nzii. ² Mekan níme Dyöb dénlaā' é ángel aá éláa ábēd betaa ménwōŋ ngíne. Bad bésyāāl ábe bénkēnhíd nímē mekan, ábe bénkēmbēl-le ngáne nímē mekan méhóbé'áá, bēnkūd nkógsen níme bēntəŋgēnnē akud. ³ Chán-nō nyéwémtné bán dehēle debíd nímén nkógsen áte nzé deewōŋne nkalaŋ ní bwām pónDé? Mmē nkalaŋ mós-'aá nípene' enén ndín e e'soóson. Sāŋgú Yesue mwēn mós asébpé bad akale təŋgene ábén e'soóson. Bad ábe bēnwōg-ke mam nímē ánhōbpē, bēmbēl syānē denyín nén bán médé mbále. ⁴ Dyöb dōmpē dénlūmēd syānē áte nén aá nímē nkalaŋ níde mbále. Ambəl nē alúmed áde álúmté e'chemléd, mekan mé menyáké ne menyáké híin. Anlúmed nē ámpē ne mekan nímē bad bēbélé'áá á ngíne e Edəádəŋ éche Esáá éche Dyöb démbéé bós. Dyöb dēmbě bad Edəádəŋ éche Esáá ngáne ébonnéde mós.

Ane awě alyágte syánē ákud e'soóson

⁵ Saké ángel chós Dyöb ábánné aá ékamlén nkōŋsé mékōlē nímē séhóbéé bán mēpě. ⁶ Bon éténlédé hōm ahóg á kálag e Dyöb pen nén bán, "A-Dyöb, cheé moonyon ádíí awě éwōŋné pónDé? Cheé mwān a moonyon ádíí éche ékós bon énoné mós?

⁷ Ayāl e esōŋ é pónDé, wembēl enkēmpaá ángel. Wembané mós á atii dé ehúmé ne edúbé.

⁸ Wembě mós ngíne ákamlén chōm ésyāāl."

Abε adé ébágé mós ngíne ákamlén chōm ésyāāl, álúmté' bán chōmchōm éesaá éche éesě ásē e

nkamlen nímē. Kénée édíí-'aá nê, deenyínéé bōob nén bán chōm esyāāl édé ásē eché. ⁹ Boŋ denyíne' ngáne Yesue ádíí. Ayāle esōŋ é pónde Dyōb dēmbēl enkēmpaá ángel. Bōob, Dyōb ábágé mó ehúmé ne edúbé née kâŋ áyāle metake míme ákúdé ne kwééd eche áwédé. Dyōb álúmté syánē nímē nsimé awé áde Yesue áwédé á nló mí bad bésyāāl.

¹⁰ Bwēm é'syāāl é'díí é' Dyōb, mó-'aá anone' bó. Ngáne édíí nén bán Dyōb áhede' aá bad híin békud etál ábé ábe bán, békud-te ehúmé, émbē mboŋ nén bán ábel mod awē ásalé bó nzii ákud metake. Nê débēl ákwognéd ábé mod awē ábēl boŋ bad békūd e'soosōŋ. ¹¹ Yesue awē abele' boŋ bad bésán, ne bad ábe bésáá, bó moosyāal bédíi bán bé Sáá nhóg. Né-'aá ákás boŋ Yesue eekwágé' áchæg bó aá baányan. ¹² Eténlédé nén bán anláá Dyōb aá, “Meélāā ábēm baányan ngáne ádoŋ dīn ápédé abé. Mēkēn wε nzé syāābōō sēlādné hōm ahóg.”

¹³ Anhób ámpē aá,

“Meésūm nímēm nlém ne Dyōb.”

Anhób-pe ámpē aá,

“Me nén, syāābe bán ábe Dyōb ábágé με.”

¹⁴ Ngáne édíí nén bán ábē bán bé Dyōb bédíi baányon ábe bēwóó ekob é yāl ne mekií, Yesue ámpē antéd yāl e moonyon née bó. Ambel nê ábel boŋ kwééd eche ánwēē ébóded ngíne eche Satanε awē abele' boŋ bad bēwág. ¹⁵ Awé áde ánwēē áhúdé bad á mehan ábe bēmbē betāŋ á alongé ádāb ásyāāl áyāle mbwóg ní kwééd. ¹⁶ Enyínnédé bwām nén bán saké ángel ánhyéé awōŋgen. Boŋ ampē áwōŋgen bad bé mbyaa míme Abrahamε. ¹⁷ Né-óó éhédnadtáá nén bán Yesue ábē melemlen née baányon á menzii mésyāāl

âbel bonj âbê prise ambáámbáa awě awóó nlém ní ngɔl, abé-'ε mod awě béhele bésuṃ nlém áyāl. Abele áde ábenléé Dyöb, ábélé Dyöb álagsan bad mbéb. ¹⁸ Ngáne édíí-'áá bán mwën antäg, ákūd-te mekəgsen, awōngan bad nzé bédé á mekəgsen-tê.

3

Yesue atómé Mosεε

¹ Né-ɔ́ a-baányan, nyé ábe Dyöb áchénlé ábê ábē bad, nyénəne' Yesue. Mó adé mbapεε awě Dyöb álómé, abé-'ε Prise ambáámbáa a mekan níme séhóbé bán sédúbpé. ² Dyöb dēmpwεd mó, ábenlé-'ε Dyöb ne nlém nhóg melemlem ngáne Mosεε ábénlé'áá Dyöb ne nlém nhóg á abum á ndáb á Dyöb. ³ Mod awě alóó ndáb, bēbelé bēbe mó edúbé tómaa ndáb eche alóó. Melemlem nê dáo Yesue ákwógnédé ákud edúbé éche étómé edúbé éche Mosεε. ⁴ Ndáb téé ewóó mod awě alóó chó. Bonj Dyöb dáo alóó chōm ésyā́l. ⁵ Mosεε abédé mbəledε á abum á ndáb á Dyöb, awě abēnlé'áá Dyöb ne nlém nhóg, álūmtē' bad mam á'sō é' pónde níme Dyöb débēnlé. ⁶ Yesu Krístəə pən abédéε Mwän a Dyöb, ákamlán-ne abum á ndáb á Dyöb ne nlém nhóg. Syánē ámpē dedíi bad bé abum á ndáb á Dyöb nzé édé nēn bán dedé déchə́hnedé, desumé-'ε nlém ne chōm éche débé́éné kúmbe, éche désúmé-'ε nlém áyāl.

Elébé ne bad ábe béedúbpε

⁷ Né-ɔ́, nyéwōg chōm-éε Edə́ədə́n éche Esáá éhóbé. Ehóbé áá,
 “Chii nēn nzé nyéwógé ehób é Dyöb,

8 nyéewúéné' Dyöb nló áte ngáne ábēn betaa
bénwūēnnē Dyöb nló áte á pónidé echē
bēnkunnénné Dyöb yǎl.

Bēnkunnén mó yǎl

á pónidé eche békógé mó é ehyánge.

9 A ehyánge wê, bēnkǎg mε,

bényín-νε mam míme míbélé é etún é móom
mé mwě méniiin.

10 Nê dóo dēnkǎη bon níliin ene nyonηel e bad bon
nhób mεé,

'Awab nlém-tê, bétamnad,
béēhídē-'aá nzii echēm.'

11 Né-óó, menliη, mmwé-'ε melě mεé

'Béesónlé áwēm abwóg dé nkóme-áte mbéd.' "

12 A-baányanη nyétéd pónidé ábel nyé mod-
mod nyéewóó nlém mé mbéb míme méédūbpē'
Dyöb, ábel bonη nyéētεdté Dyöb áde ádé á alongé.

13 Bonη pen nyéwéde' nhóg ne aníní nlém á abum
epun téé, ngáne échē epun échágnédé bán "Chii",
ábel bonη mbéb méedogé nyé modmod áwúēn
Dyöb nló-áte. 14 Syánē dedíi mod nhóg ne Yesu
Křístæ, nzése delyǎgé decháhēnéde kóóη ne á asóg
ne mekan míme désébpé adúbe tâηgene Dyöb.

15 Demaá anyín nēn bán éténlédé á kálag e Dyöb
nēn bán,

"Nzé nyéwógé ehób é Dyöb,

nyéewúéné' Dyöb nló áte

ngáne ábēn betaa bénwūēnnē Dyöb nló áte á
pónidé eche bēnkunnénné Dyöb yǎl."

16 Benzébádé bēnwōg ehób é Dyöb bonη
békunnén Dyöb yǎl? Abê bad bésyāāl, saá
bad ábe Mosεε ámbídēnnē á Egipto bēbédé-yε?

17 Benzébádé Dyöb dēnliín-naá é etún e móom

mé mwé méniiin? Saá bad ábe bēmbel mbéb bōō bēnnaá ndim é ehyánge-ye? ¹⁸ Benzébádé Dyōb démwēē melě aá béésónlé áwe abwóg dé nkóme-áte mbéd? Saá bad ábe békēmběl ngáne áhédé'áá-ye? ¹⁹ Né-ōó, denyíne' nén bán, bénkēnhenlé asól áyāle bénkēndúbéé Dyōb.

4

Nkóme áte míme bad bé Dyōb békudté

¹ Ahób áde Dyōb dénhōbpē aá syánē dēsōl áwe abwóg dé nkóme-áte ádii étyéémé. Né-ōó déttéd póndé ábel boŋ nyé modmod eebóó' asól áhed.

² Syánē ámpē dewógé nkalaŋ mí bwām melemlen ngáne bōmpē bēnwōgkē. Bēnwōg mímē nkalaŋ mí bwām boŋ ménkēnwōngénné bó ne awōngēn dēn áyāle nén, bénkēndúbéé mō. ³ Bōōb-pōó, syánē ábe dedúbpe mímē nkalaŋ, desóle' ádé abwóg dé nkóme-áte. Boŋ ne bad ábe bēédúbpe pen, Dyōb dénhōb aá,

“Menlīŋ, mmwé-'ε melě nén meé,

‘Béésónlé áwēm abwóg dé nkóme áte mbéd.’ ”

Anhób nē, kénéē edíi bán ammad míme nsón amad se áde áhágé nkōŋsé, abwóg dé nkóme áte dēmmād-te abé. ⁴ Eténlédé á kálag e Dyōb tēŋgene epun éche élónténé epun saámbé nén bán, “Dyōb dēmmād míme nsón. Né-ōó ankómé áte epun éche élónténé epun saámbé.” ⁵ Eténlédé á kálag-tē wē ámpē bán Dyōb áhóbé aá,

“Béésónlé áwēm abwóg dé nkóme-áte mbéd.”

⁶ Né-ōó, etál edíi ébágnédé donge á bad ásól á hōm dé nkóme-áte. Boŋ bad ábe bēnwōg nkalaŋ mí bwām se' bōód, békēnhenlé asól, áyāle nén békēmbenlé mekan míme Dyōb dénlāā'é bó

aá bébel. ⁷ Nê dêmbĕl, Dyöb dêmpwĕd epun émpĕe, áchĕg-ke chó aá “Chii.” Anhób nê etûn é pónde ámbĭd echĕ ábĕd betaa bĕnkĕmbĕnlé ngáne ánhĕbpĕ aá bébel. Anhób nê mbwiined ne e'yale ábe Dabide ábe mímáá nyé atele nén mĕé, “Chii nzé nyĕwógé ehób é Dyöb, nyéewúéné' Dyöb nló-áte.”

⁸ Nzé émbĕ nén bán hĕm áde Josua ânkeénné bad dŏo dĕnkŏŋ hĕm dé nkóme-áte abé, né ámbĭd e pónde Dyöb dĕnkĕnhóbpe tĕŋgene epun émpĕe.

⁹ Né-ŏŏ hĕm dé nkóme-áte áde áde nĕŋgáne nkóme-áte míme Dyöb dĕnkŏmĕĕ áte áde ámáá nkŏŋsé ahĕg ályágé ásine ábĕ bad. ¹⁰ Kĕnzĕé awĕ asólé á abwóg dé nkóme-áte á Dyöb, akŏmme áte áyāle amadé míme nsŏn, melemlem ngáne Dyöb dĕnkŏmĕĕ áte áde ámáá nkŏŋsé ahĕg. ¹¹ Né-ŏŏ syánĕ déwan áte désŏl áde abwóg dé nkóme-áte, ábĕl bon syánĕ modmod deebŏŏ asól áhed. Deehídé' mekuu míme bad ábe bĕnkĕmbĕl ngáne Dyöb dĕnhĕbpĕ. ¹² Debíí nén bán Eyale éche éhuú ne Dyöb, édé alongé, édé-'ε ngíne. Ekóbpe' tómaa páá e nsəl mĕε. Esóle' mod áte káŋ se á mbom ní ngob e yəl ne edăádŏŋ. Esóle-'ε mod káŋ se á mebŏŋ mé yəl ne á e'hid-tĕ. Echĕ eyale écheme' mewĕmtĕn mé mod ne kéchéé éche mod áhedéé abel. ¹³ A e'só é' Dyöb, chŏmchŏm éesaá á e'koŋéd. Chŏm ésyāal édé á tâl é ekwĕε. Dyöb dŏ-aá dĕtŏŋgéné mekan mésyāal mímĕ débĕléé aláa.

Yesue adii ndale e prise ambáámbáa

¹⁴ Né-ŏŏ, ngáne déwŏó Prise Ambáámbáa, Yesue Mwăn a Dyöb, awĕ akií ámĭn á'sŏ é' Dyöb, déchĕŋned adúbe áde désúme nlem

áyāl. ¹⁵ Awesyánē Prise Ambáámbáa asónténé mechínzé mímēd, áyāle nén mómpe ankūd melemlēm mé mekǽsēn míme dékudēé á menzii mésyāāl, boŋ kénê, enkēnbenlé mbéb. ¹⁶ Né-óó ne e'sum bé nlém désíde benben ne atii dé nkamlēn á Dyōb áde ábage nsimé. Deewógé mbwóg ké nhóg. Débel nê ábel boŋ Dyōb áwóg syánē ngal, ábāg-ke syánē nsimé mímē méwōngān syánē pónde téé eche détógnéné nwōngēn.

5

¹ Prise ambáámbáa téé awē Dyōb ápwédé áfinté e bad, ápwede mó ábele mó á dīn áde ábē bad. Ane prise móo akobe' mende wée bad boŋ ábagé mó wée Dyōb née nde ne mende ábel boŋ Dyōb álagsēn bad mbéb. ² Ahēle bad yāl achedēn ábe bépane' nzii áyāle béebii' é chōm éche bébeléé áyāle nén mwēn ámpē adii moonyoŋ awē awóo mechínzé mé ngob e yāl. ³ Nê ábélé atāngéné née ábageé mende káōne áyāl e míme mbéb mēn, ábage-'e áyāle mbéb mí bad. ⁴ Modmod mwēn eéhēlē-sē ábe yāl edúbé é prise ambáámbáa. Dyōb dōo ápwede' mod ábé prise, melemlēm ngāne ámpwēdté Arōne.

⁵ Melemlēm nê dō-'aá Krīstā mwēn énkēnchógédté yāl ábé prise ambáámbáa. Dyōb dōo dēmpwēd mó. Dyōb dénlāā mó aá, “Edii awem Mwān.
Chii ndii Sóó.”

⁶ Nê ádé á kálag e Dyōb hōm dēmpēe bán Dyōb dénlāā mó aá
“Wēébé prise abe ne abé,
née Melkizēdege.”

⁷ Ade Yesue ábédé á nkōjsé, akánné'áá, áchāā Dyōb, áchyéé' awé á ngīne, mēsod mébidē' mó á

m̄id. Akánné'áá wéε mod awě ahεle ásōη alongé ádē. Dyōb dénwōg mó mekáne áyāle anwōη mbwóg ní Dyōb áte. ⁸ Kénéε ábédé Mwān a Dyōb, an'yágé áwógεn Dyōb mbwiined ne metake míme ánkudté. ⁹ Dyōb dēmbēl ankwognéd abé-'ε prisε ambáámbáa awě akwōgnédé, ábel bad ábe bēwógne mó békud e'soósoη ábe é'dé á ngíndé ne á ngíndé. ¹⁰ Dyōb dēmbané mó á atii aá mó adé prisε ambáámbáa née Melkizεδεγε.

Elébé ábel mod éétdé adúbe

¹¹ Nwóó mam híin áhób t̄ηgεne ádén atón. Elénlé mε áte ngáne mébenlé boη nyésóηtén mó, áyāle nén nyéewámsánné dyam asóηtεn. ¹² Nhóbe nén áyāle nén nyént̄ηgén bad abé bōob ábe báyágte' bad bēmpē. Boη nyédíi nyéhεdnad ámpē bán mod áyáged nyé mam míme nyēmmadté abíi t̄ηgεne nkalan ní Dyōb. Nyédíi nyédé née bán bé nkóál ábe béhεdnad abíi saké ndyééd. ¹³ Kénzéé awě adíi amwáa' abíi, adíi née nkóál. Eébt̄i'ε mboη ne mbéb. ¹⁴ Ndyééd pεn edíi áyāle bad ábe bémáá akwog. Mod ambáá adíi mod awě ayágkε, awě amēnténé-'ε mboη ne mbéb ábíi.

6

¹ Né-óó dékεεne adúbe á'sō n̄ηgáne bad ábe bémáá dyam abíi. Deet̄ηgεnεé née détédeé pónde ámpē áyáge mam míme bēn'yágēdtē syānē t̄ηgεne Kr̄ist̄æ se á mbooted. Demmād ayáge, debí-'ε nén bán bad bét̄ηgéné békúné mbíd, bētēdē abel dé mekan mé mbéb míme mépεεne' kwééd. Demmād-tε abíi nén bán bét̄ηgéné Dyōb adúbe,

² báyāgtē bad t̄ngene edusen* ne t̄ngene abán á bad mekáá á nló. Debí-'ε nén bán bétāngéné bad ayóged t̄ngene mpuu ne t̄ngene mbakú e nkáásé echē ēbē abé ne abé. ³ Deétdé nímén mekan. Dékag á'sō nzé Dyōb ábágé etál.

⁴ Nhóbe nén áyāle nzé bad bétédté ádab adúbe, mod éēhēlē-sε ápēēn bó ámbid ámpē, bētēdē nímab mbéb bétimen Dyōb. Nhóbe bad ábe bēnkūd e'nyínen bé ekíde, bēwóglén nnam í Dyōb, békūd-τε Edāádā ēche Esáá néε bad bēmpēe. ⁵ Bēwógléné e'boŋ bé eyale é Dyōb, bényín-ne ngine echē ēbē á pónde eche Dyōb dékamlénné. ⁶ Nzé ábē bad bémáá-'ε nímē mekan anyín boŋ bétíme bétédté ádab adúbe, mod éēhēlē-sε ápēēn bó ámbid ámpē áτede mbéb áhíd Dyōb. Abán áde bébáá'ε Mwán a Dyōb áyāl, ébelé ébé byánán bébomme' mó á awog ámpē, bēkwāgtē-'ε mó á'sō é' bad bēmpēe. ⁷ Ndōob eche mbúú éyógké achóoted boŋ mendíb mésól ásē, ebele bwēm é'kwog bwám. Abē bwēm é'belé é'wōngān bad ábe bēwéné bó. Nē álúmte bán Dyōb ánamte' ene ndōob. ⁸ Boŋ nzé ene ndōob ekwogte' mekōd ne e'sum bé mbéb bēmpēe, né eésáá dyam de abelen. Né kóāŋ ne á asóg béhyāād-τε chó.

⁹ A-baányan, kénéε rílanḡéé nyé nén, ndúbpé nén méé nyēbele' mekan nyaa eche nyékudté mekan mé bwám mé e'soósoŋ. ¹⁰ Dyōb ábele' nímē mekan nyaa echē etāngéné. Eéchatánné nsón ké nhóg níme mod ábelé, échatán-naá edāŋge éche mod

* **6:2** Edusen: echē edusen énkēmbáá edusen echē bédúsánnáá bad ábe bédúbpé Krístā bēnpen. Bad bé Israel bómpē bēnwōŋ elem éche bédúsánnáá bad, bédúsán-ne bwēm bēmpēe.

álúmté mó ngáne nyédíi nyébeñléé bad bé Dyöb bémpēe. ¹¹ Mmed nlém ndíi nén bán nyé mod téé nyébê nyéwōñ ene kán kóñ ne á asóg ábel boñ nyékude' chōm ésyāāl éche nyésúmé nlém áyāl bán Dyöb débe nyé. ¹² Séehēdēē bán nyébê bad ábe béehédé chōmchōm ábel. Boñ sēhede' bán nyébê bad ábe béhíde' mekuu míme bad ábe béwesán áyāle bédúbpé Dyöb. Echē ndín é bad éküð chōm ésyāāl éche Dyöb áhóbé aá móṣbē bó.

Dyam áde Dyöb áhóbé déehídtéé ásē

¹³ Se' bōd áde Dyöb dénhōbpē aá móṣbelé Abrahame dyam, ammwé melē aá móṣngēñē áde akag alóned. Ade dñn dñn dōo ámmwēññē melē áyāle nén modmod eebédeé awē atómé mó awē áhélé'áá-se amwé melē áwe dñn. ¹⁴ Anhób aá, “Nhóbé nén mēé, ntōñgéné we anamed, mēbēl-le mímōñ mbyaa mbūū áte bwāmbwam.”

¹⁵ Abrahamé anwesén ásūm-me nlém, né-ṣó anküð chōm éche Dyöb dēmbēññé mó akag. ¹⁶ Nzé mod amwāg melē abenlad dñn áde mod awē atómé mó. Mpenten ké nhéé-'ε mímē bad béwóo'é, melē móo méyāñle'. ¹⁷ Dyöb áhédé'áá ábê bad ábe ámbéé akag alúmed áte nén aá, móhúdté dyam áde móhóbé ásē. Né-ṣó amwé melē ásoṣten akag áde ábágé. ¹⁸ Né-ṣó Dyöb ábágé syāñē mekan mébe mímē méehēñlán áyāle Dyöb déehelée-se ákal metóm. Abagé syāñē akag, amwé-'ε melē. Abelé nē ábel syāñē awē dekii áwē ábel ákəə syāñē, déwōñ e'wéd bé nlém, désum-me nlém ne mekan míme áhóbé aá móṣbē syāñē. ¹⁹ Abē e'lyág bé nlém é'díi néé chōm éche ébélé alongé ádēd ásúmnédé, ákoñéd-te. Ebé e'lyág bé nlém bōo békāñ boñ

detóm abad dé mmwε ámīn, dépe á abwóg á hōm áde ásáá wée Dyōb ádíí. ²⁰ Yesue mó asébpé asól áhed á nló míme syánē ábonʒen syánē e'dii. Bōob atimé prise ambáambáa awêd awě adé á ngíndé melemlem née Melkizεδεγε.

7

Melkizεδεγε abédé Prise

¹ Melkizεδεγε abédé kâη e dyad á Salem, abé-'ε prise a Dyōb á Ngum. Ambomén Abrahamε áde Abrahamε áhúé'ε á bel ábe ánwū'ε kâη é bad, ánāmēd-τε Abrahamε. ² Abrahamε-'ε ábe mó akab á bwēm ahóg átínté mekab mé bwēm dyôm míme ánhūēnnē á bel. Dyam dé'sō, dīn á Melkizεδεγε á ehób é Hibru ádíí bán, "Kâη eche ebele mam míme ítâηgéné." Atón áde álónténé mébe ádíí bán "Kâη e Salem," awě adé "Kâη e nsan." ³ Eetenledéé hōmhōm nén bán Melkizεδεγε anwōη sáá, ké'ε mbyaa. Béetele-'áa ngáne béchyáá mó, ké'ε ngáne áwédé. Adii prise á ngíndé ne á ngíndé melemlem née Mwān a Moonyonη ádíí Prise á ngíndé ne á ngíndé.

⁴ Nyénōne-ōó nyaa e ndāle e mod echě Melkizεδεγε ábédé. Abrahamε, sáá ambáá awêd, ambě mó akab ahóg átínté e mekab mé bwēm dyôm míme ánhūēnnē á bel. ⁵ Mbéndé e Mosεε ebagé kunze nén bán bad bé mbyaa míme Levi ábe bédé beprise békobe' akab á bwēm ahóg átínté e mekab dyôm téé, wée ábāb bad bé Israel, kénée émbēē bán bómpē bébédée mbyaa míme Abrahamε. ⁶ Melkizεδεγε enkēmbídté á mbyaa míme Levi, bon kénê ankōb akab á bwēm ahóg

átíntê e mekab dyôm wée Abrahamε. Annaméd-
te Abrahamε, Abrahamε awě Dyõb dêmmadté
akag abε. ⁷ Ebyééné nén bán mod awě anamte'
mod atómé mod awě ánámté. ⁸ Βααβ-ρσό, prise
éche ébídé á mbyaa míme Levi ábe békobe' akab
ahóg átíntê e mekab mé bwēm dyôm, bésyāā
bédii baányonj ábe bėwāg. Βοη Melkizedεγε
awě ankõb akab ahóg átíntê e mekab dyôm,
adii mod awě eewéde, ngáne kálag e Dyõb
élũmtεé. ⁹ Dehele dehób bán Levi awě akobé'áá
mekab wée bad mwēn ámpē abagé akab wée
Melkizedεγε mbwiined ne sáá ambáá Abrahamε.
¹⁰ Dehele dehób nê áyāle nén, áde Melkizedεγε ákíf
Abrahamε abomen, né béēchyāā' é Levi.

¹¹ Dyõb dêmbě bad bé Israel éche mbéndé á
póndé echě bad bé túmbé e Levi bėbédé beprise á
alonj á Israel. Nzé nsón míme ábê beprise bėbélé'áá
ménkwognéd ábel bad bėkobned á'sō é' Dyõb,
né nzom enkēmbáá echě prise ampée ábídeé née
Melkizedεγε awě eebíde á mbyaa míme Arone.*

¹² Nzé mpwēdtéd mé beprise ríhóhéné túmbé,
né mbéndé chómpē etáhgéné ahəhəlen. ¹³ Mod
awě ríhóbεé mímén mekan áyāl, ambíd á túmbé
empée. Modmod eébidē-'áá awe túmbé mbéd
awě abelé nsón míme prise. ¹⁴ Ebyééné bwām nén
bán Sánḡwée awēd ambíd á túmbé e Juda. Mosεε
enkéntúbpé đin nén áá beprise bėbíd á túmbé e
Juda.

Yesue adii nées Melkizedεγε

* **7:11** Arone: Arone ambíd á tumbé e Levi. Mó abédé prise
ambáámbáa e'só e bad bé Israel.

¹⁵ Dyam ádè déhóbé t̄ngene ahəŋlən á mbéndé ábúdé anyinned ne abíd áde prise ampée ábídé née Melkizεδεγε. ¹⁶ Saké mbéndé é baányon chǎó émb̄l bon abé prise. Bon adé prise áyāle awóó ngíne ábé á alongé abé ne abé. ¹⁷ Eténlédé á kálag e Dyöb nén bán,

“Edii prise á ngíndé ne á ngíndé,
melemlem née Melkizεδεγε.”

¹⁸ Nzé denəné pəd póg, Dyöb ásídté mbéndé é’ bǎód á nkæg, áyāle énkênwúú’ é áte, énkênkwógnéd-taá.

¹⁹ Debíí nén bán mbéndé eébb̄l̄ēē-se chǎmchǎm ébé ngáne étǎngéné abé. Nzé denəné-’ε pəd eníníí, chǎm é bwám épédé échē ékǎá bon dewón e’lyág bé nlém. Chǎ-’aá épεene syánē benben ne Dyöb.

²⁰ Dyam démpēe áde débíí ádíi nén, Dyöb démwē melǎ aá Kr̄st̄əə äbē prise abé ne abé. Bon áde bēmpwēdté beprise bēmpēe, Dyöb dénkēmmwáá melǎ ké nhóg. ²¹ Bon áde Dyöb ápwédé Yesue prise, anhób aá,

“Sǎngwéé amwédé melǎ,
éehúd-taá mímé melǎ ásē,
aá,

‘Edii prise á ngíndé ne á ngíndé.’ ”

²² Mmē melǎ mélúmte nén bán Yesue mó adé e’chemléd ábé é’lúmte syánē nén bán melǎ míme Dyöb ámwédé méehidtée ásē. ²³ Beprise bé’ bǎód bēmbuú áte áyāle nén kwééd ebélé’áá béehēle’áá nsón akεen á’sō. ²⁴ Bon ngáne Yesue ádíí á alongé abé ne abé, äbē prise á ngíndé ne á ngíndé. ²⁵ Né-ǎó, Yesue akwǎgnédé áson alongé á bad ábe bēpag wēε Dyöb áwe mbíd. Akwǎgnédé áson bó ne ason ásyāāl áyāle nén, adé á alongé pǎndé ésyāāl ákǎnned bó.

26 Ehédnádtaá nén bán déwōη ene ndín e prise ambáámbáa awě asáá, mod eéhēlēē se ahób mó awusé ké hóg áyāl, eewóó'é atón á mbinde ké hóg á yāl, awě apágnédé bad bé mbéb áyāl, bēbānē-
 'ε mó ámīn e atii dé nkamlēn ámbáá. 27 Eesaá nēε beprise ábiníí ábe bétāηgéné bēbage mende epun-té. Abē beprise bésébpε mende abε áyāle mímab mbéb, boη bēbage mende áyāle mbéb ní bad bēmpēε. Boη Yesuε ambε yāl nēε mende áyāle mbéb ní bad. Ambēl-le nē ngen póg ne ngen ésyāāl. 28 Mbéndé epwεde baányoη ábε beprise bēmbáámbáa. Baányoη bēbele' mewusé. Boη Dyōb dēmpwēd awe Mwān ne melě áde ámáá mbéndé abε. Abelé-ε ane Mwān akōbnédé á ngíndé ne á ngíndé.

8

Yesuε mó adé syánē prise ambáámbáa a melě mékōlē

1 Atón áde sékoo'é ahób ádíi nén; dewóó ene ndín e prise ambáámbáa awě adyεé é ekáá émbáá é atii dé nkamlēn á Dyōb á Ngum ámīn. 2 Abenle' Dyōb wéε bwēm ábē é'sáá é'díí á hōm áde ákóó ebem é Dyōb abé. Sāη Dyōbε mwēn móó alóó échē ebem, saké baányoη.

3 Bēpwεde prise ambáámbáa tée ábe Dyōb ndε ne mende mé elém. Né-óó, anén prise ambáámbáa mómpē atāηgéné chōm awōη éche ábeé Dyōb.

4 Bōōb-pōó, nzé émbē nén bán ambé á nkōηsé, né éebáá prise ne abé dēn, áyāle nén beprise bédé ábe bēbage Dyōb mende ngáne mbéndé éhεdεé.

5 Nsón míme ábē beprise bēbeleé ídíi nēε e'chemléd ne edíídingε é' mekan míme médé ádyōb. Debíí

nê áyāle nén, áde Mosεε áhóbé aá mólōo' ebem é Dyōb, Dyōb dénsim mó etúu áte aá, “Nyín nén wéε mólōō chōm ésyāāl á yāl e échē ebem nyaa e nloŋtéd eche rílúmté wε á mbōōd m̄n.” ⁶ Boŋ bōōb, nsón níme prise níme bébágé Yesuε rítómé nsón níme ábê beprise bé' bōōd. Melemlem nê dōō nchemtεn níme Yesuε ápééné átínté e Dyōb ne ábē bad, rítómé nchemtεn mé'sō níme bēmpεénné, áyāle nén, Dyōb ábágé bad akag aá móōbē bó bwēm é' bwām.

⁷ Nzé émbē nén bán melě mé'sō mēnkwoǵnéd ábεl bad békobned á'sō é' Dyōb, melě mémpēe méehεdnad-taá. ⁸ Boŋ Dyōb dénniyin awusé ne ábē bad, anhób-pe aá, “Me Sánǵwéé nhóbe' nén mεé e'pun é' b̄n é'húε áde mémwēē melě mékōōlē ne bad bé Israel ne bad bé Juda.

⁹ Mmē melě méebáá néε melě níme mémwēē ne ábāb betaa áde ríchǵǵé bó á ekáá boŋ mbídén bó á alon á Egipto. Bénkēnhídté nímē melě. Né-ō, menhúd bó d̄id áyāl.

¹⁰ Dyōb áhóbé ámpē aá, Me Sánǵwéé mε-εé nhóbe'. Bōōb-pōō melě níme mémwēē ne bad bé Israel á pōndé echē ehúε' á'sō médii nén: Mǵb̄l bēbíí échēm mbéndé, bēwōŋ-'ε nlém áhíd chó. Mēbē ádab Dyōb, bó-'ε bēbē ábēm bad.

¹¹ Bó modmod éeyágédté waáb,

modmod éeláá-'áá mwǎnyan nén aá ábíi Dyöb,
 áyāle bó moosyǎel bébīi me,
 bootya bésad, kááη ne bémbáá.

¹² Meélagsén mímab mbéb,
 méekamtén-naá mímāb mewusé.”

¹³ Ahób áde Dyöb áhóbεé tâηgene melë mékṣṣlē,
 álúnte' nén bán abelé melë mé nchun ítómé
 pónde. Chöm kéhée éche étóme pónde, éche
 échune-'ε, mwǎmpīn mí pónde éebáá ámpē ne abé
 děn.

9

*Abele á Dyöb dé ekob é yǎl
 ne abele á Dyöb dé Edǎǎdǎη*

¹ Bǎǎb-pǎǎ, kááη ne melë mé'sō ménwōη mbéndé
 éche béhíde'áá ábele Dyöb, bénwōη-ge abwǎg á
 hǎm á nkōηsé wéε bébénlé'áá Dyöb. ² Bénlōη
 ebem éche énwōη toη éβε. Toη echë embé á'sō
 béchágé'áá chό bán Hǎm áde Asáá. Atii dé etrukán
 ábédé áwēd-te, tébelε abé, ne ewεle éche bébágé
 Dyöb mende. ³ Abad démbē áde ákábé toη e'só
 ne toη embíd áte. Ene toη eche ebédé ámbíd
 e abad béchágé'áá chό bán Hǎm áde Atómténé
 Asáη. ⁴ A toη-tê wê, menyán míme bébénlé gól míme
 béhyánté'áá e'twé ámīn áβε Dyöb edúbé mébédé
 áhed. Ntyág míme béchágé'áá bán ntyág mé melë
 mómpē míbédé áhed. Mmē ntyág bénkūtēn mó pēd
 ésyāēl ne gól. A ntyág-te wê, apom á gól áde ábédé
 mána áte abédé áwēd-te. Ntón míme Arǎne míme
 ménkǎg byáá, míbédé áwēd-te. E'pēd é' meláá é'βε
 ábe bēntenlé mbéndé áyāl bómpē é'bédé áwēd-te.
⁵ A ntyág mīn wê, bwēm é'bédé é'βε, ábe bébélé
 á nwágēn ní ángel, ábe é'lúmté'áá ehúmé é Dyöb.

Mepab níme ábê bwëm ménkūtēn ebéd é ntyág wéε ábédé hōm dé alagsen dé mbéb. Boη ábê bwëm é'syāāl deéhēlēε-se dékoη bó ahób bəəb.

⁶ Bémáá'áá chōm ésyāāl anabe boη, beprise bésóle á toη é'sō epun-té bēbelé' nímab nsón. ⁷ Boη prise Ambáámbáa mwēmpen móo asóle á toη echē edé áte. Asóle áhed mwē-té ngen póg. Eesóléé mbéd áde éewanléé mekií mé nyam áβε Dyōb mendε áyāl e mbéb nímē ne mí bad bēmpēe, níme bēbelé ésebán bēbí bán bēbelé mbéb. ⁸ Edəədəη éche Esáá ébele nímén mam álúmed syánē áte nén aá, abenled áde dédíi débēnladté ebem é nkōηsé, ábélé nzii eesaá syánē áπε á Ebem éche Esáá wéε Dyōb ádíi. ⁹ Echē ebem élúmte mekan níme mébenlad chii. Elúmte syánē nén bán ndε ne mendε mé nyam níme bad bēbágé'áá Dyōb, méehelée-se mébel nlém níme mod awē abage mendε se ríkélé á abum. ¹⁰ Mmén mbeltéd rísyāāl rínəne' dásō adyé á ndyééd, amwé á mīm ne nyaa é mekan émpēe híin échē bad bēbelé'áá áśáad yāl. Mmē mbeltéd rídii mbéndé e ekob é yāl ngên, éche émaá á pónde eche Dyōb dénabée mam mésyāāl.

Mekií níme Yesue móo médé ndε echē esáá

¹¹ Krístəə amaá aπε. Móo adé Prise Ambáámbáa a mekan mé bwām níme mémáá aπε. Abele níme nsón á ebem éche étómé ebem é nkōηsé, élón-ne mbom tómaa ebem é nkōηsé. Saké baányoη bēlóo échē ebem. Eesaá ebem éche édé á nkōηsé. ¹² Ade Yesue ásólé á ebem-tē wē, ansól áde Hōm áde Atómténé Asáη ngen póg ne ngen ésyāāl. Saké mekií mé mbód ne mé nyag ânkeénné áwēd-te áβε mendε. Boη nímē mekií

mèn mṓo ántēdtē. Ambenléd mṓ ákṓde syánē á mbéb-te ábel débê á alongé á ngíndé ne á ngíndé. ¹³ Ngen e'só, bétédé'áá mekií mé mbód ne mé nyag, bétéd-te mbúmbú é etum é nyag éche béhyánté, bémwagtáád bad á yǎl ábe béésáa á'sō é' Dyöb, ábel bésân. ¹⁴ Nzé édé nén bán mekií mé nyam méhēle méwōḡ ngíne ábel bad bésân, né élúmte nén bán mekií níme Krīstæ méwóó ngíne bwāmbwam, eche ehēle esáád bad. Abagé eche yǎl eche eewóo mbéb ké nhóg néε mendε, ákṓde syánē moosyáál. Ambel nén á ngíne e Edæádḡ éche Esáá éche édé á ngíndé ne á ngíndé. Mmē mekií mṓo mésânḡte syánē nlém á abum ábel nén deébēlē mekan mé mbéb níme mépiinéd syánē kwééd. Boḡ pεn detánḡéné Dyöb dé alongé abele.

¹⁵ Né-'aá ákṓá boḡ Krīstæ abé mod atíntē a melḡ mékṓlē ábel nén bad ábe Dyöb ápwédé békud nnam níme mébē abé ne abé. Mmē nnam mṓo Dyöb áhóbé aá mṓbḡ ábe bad. Kwééd echē Krīstæ áwédé chṓ ekṓá boḡ nén ábenlad. Eche kwééd ekṓdté bad ásē e mbéb níme bēmbenlé áde melḡ mé nchun médii mékámíánnáá bṓ. ¹⁶ Bṓṓb-pṓṓ, melḡ médii néε nlyáge. Póndé ké ehéé áde mod alyágkεé, étánḡéné alúmed nén bán mod awē abele nímē nlyáge amaá awé boḡ béhídē chōm éche ályágkε. ¹⁷ Nén ádé áyāle nén, á póndé echē mod áwédé dṓo níme nlyáge mbágkē ngíne. Méébāgkē ngíne á póndé eche mod awe abelé nímē nlyáge ádíí adé á alongé. ¹⁸ Nê dṓo ákṓá boḡ ké melḡ mé'sō níme Dyöb démmwεε ne baányoḡ ménkēnwōḡ ngíne ésebán mekií mésyogke. ¹⁹ Se' bṓṓd, Moseε anláá bad mbéndé ésyāál éche Dyöb dénhōbpē aá bad béhíd. Ade ámáá bṓ aláa, antéd mekií mé

nyag ne mé mbód, ákumtén ne mendíb. Ambenléd ngen e bwel é' hísab ne nyon é mbód éche éyáge', ámwagtéd nímê mekií á kálag eche mbéndé ébédé áte, ámwagtéd-te bad á yál. ²⁰ Ade ámáá nímê mekií amwagted, anhób aá, “Mmén mekií móō mélúmte' nén bán melē mé Dyōb méehəŋlánné.” ²¹ Melemlem nê dōō Mosεε ámmwagtédte nímê mekií ámīn e ebem é mendε, ne ámīn e bwēm é'syāāl ábe bēbēnládtáá áβε mendε. ²² A mbále, émbē nén bán á mbéndé, chōm ké éhéé éche bémwágtédé mekií áyāl chōō bad bétédé'áá bán ésáá. Mbéb-pe méewóo'έ alagsen ésebán mekií mésyógké.

*Krīstəə eche yāl echē ábágé
néε ndε chōō ehúdé mbéb*

²³ Né-óó, nén dōō dēnkəŋ boŋ ebem é nkōŋsé né bwēm é'syāāl ábe é'dé áwēd-te bésāŋtē bó ne mekií mé e'lém. Abē bwēm é'syāāl é'bédéε nwágen mé mekan níme médé ámīn níme mékōŋté abé. Boŋ ábē bwēm ábe é'dé ámīn, bēntəŋgēn néε bésāŋtεé bó ne mekií níme métómé mekií mé e'lém. ²⁴ Krīstəə enkēnsónlé Hōm áde Asáá áde baányon bóbó bēbélé, áde ádé á nwágén á hōm áde ákōŋté abé. Adyōb dēn dōō ánkεé asól. Ankě-ε áwēd nēŋgáne mod awē ahóbpe' syánē wéε Dyōb. ²⁵ Enkēnkaá-'áá áwēd áβε yāl néε mendε ngen ne ngen. Enkēnkáa nēŋgáne prise ambáambáa ákagké mwě téé á Hōm áde Atómténé Asāŋ áβε mendε mé mekií mé elém. ²⁶ Nzé néε émbēē, né Krīstəə antəŋgén néε átagεé ngen ne ngen taase nkōŋsé míbootad. Boŋ chō-'ε énkēmbáá nē. Krīstəə ampě ngen póg ne ngen ésyāāl bōōb áde nkōŋsé níkagké ape á asóg. Ambě eche yāl nēŋgáne mendε

âhúd mbéb mí baásyāāl. ²⁷ Nê dōo moonyon̄ asyāāl átānjéné awé ngen póg, bon̄ ámbíd e pónde ákud nkáásé ní Dyōb. ²⁸ Melemlem nê dōo Kr̄stəə ábágé eche yāl ngen póg ne ngen ésyāāl âhúd mbéb mí bad híin. Ap̄ĕ-’ε ngen éche élónténé éβε, saké âhúd mbéb mí bad, bon̄ ap̄ĕ âson̄ alongé á bad ábe básine mó.

10

*Kr̄stəə ábágé eche yāl
ngen póg ne ngen ésyāāl*

¹ Mbéndé éche Dyōb dēmbéé bad bé Israel ébedéε ngēn nēngáne nwágén mé mekan mé bwám míme méhúε’ á’sō. Echē mbéndé éehelélé-σε ékon̄ syánē alúmed ngáne míme mekan mébēε. Beprise bébage’ Dyōb mendε abε ne abε, mwĕ ne mwĕ-té. Chán-nō échē ndín é mbéndé éche bébageé échē ndín e mendε éhele ébēl bad ábe bédé benben̄ ne Dyōb básán? Ehelélé. ² Nzé émbē nēn bán béhélé’áá, né bēnkēnsógké Dyōb mendε abε-yε? Né bēnsōg áyāle nēn né bad ábe bébage Dyōb mendε básáá’áá ngen póg ne ngen ésyāāl, né béetage’áá-ε áte bán bébélé mbéb. ³ Bon̄ míme mendε mēn-εé métímé mékamtan bad mwĕ ne mwĕ téé nēn bán bébélé mbéb, ⁴ áyāle nēn mekií mé nyag ne mé mbód méehelélé σε méhúd mbéb mí bad mbéd.

⁵ Nēn dō-’áá dēnkān̄ bon̄ áde Kr̄stəə ápédé á nkōnsé-te aláá Dyōb áá,
“Saké mendε ne ndε éhedεé.
Ebōnséné me yāl e moonyon̄ echē méβεé wε nēε mendε.

⁶ E’lém ábe béhyánté á menyán,

mende-’ε ámpē míme bad bébageé wε áhúd mbéb
 mí bad,
 béewōgtēē wε menyinḡe.

⁷ Dó-’aá ríhóbéé mεé,
 ‘Με nén A-Sán,
 mbōḡséné ábel ngáne éhedeé
 melemlengáne éténlédé áyāl echēm á kálag
 echōḡ.’ ”

⁸ Ansébé ahób aá, “Saké mende ne nde éhedeé saá-
 kaá e’lém ábe béhyánté á menyán áhúd mbéb
 mí bad é’wōgte wε menyinḡe” kénéé édíí nén bán
 bad bébéle’áá mímén mekan ngáne mbéndé e
 Mosee éhedeé. ⁹ Ambé ambád aá, “Με nén A-
 Sán, mbōḡséné ábel ngáne éhedeé.” Né-óó, Dyōb
 ásídté mende mé’ bōód á nkag ábel boḡ átimeḡ
 mende míme Krístə. ¹⁰ Akwénten áde Yesu Krístə
 ákwénténé abel ngáne Dyōb áhedeé boḡ ábe eche
 yāl nēḡngáne mende, ábéle syánē desáá á’sō é’ Dyōb
 ngen pōḡ ne ngen ésyāāl.

¹¹ Nsón míme beprise bé Israel nídíi átyéem ábe
 Dyōb mende mehóg ne mehóg epun téé. Mmén
 mende mó-’ε méehelée se méhúd mbéb mí bad
 mbéd. ¹² Boḡ Krístə pen abagé mende mehóg
 míme méwóó ngíne áhúd mbéb mí bad ngen pōḡ
 ne ngen ésyāāl. Ámbíd enê, andyéé Dyōb á ekáá
 émbáá. ¹³ Áhed-taá ádyée ásin pónḡé echē Dyōb
 débenlé boḡ ákōḡtéd ábē bad bé ekoyí ámín ne
 mekuu. ¹⁴ Ayāle mende mehóg mwēmpen míme
 ábágé, abelé bad ábe áhúdé mímab mbéb básáá
 nyaa eche elóné mbon.

¹⁵ Edəádəḡ éche Esáá chómpē élúmté syánē áte
 nén bán nê ádé mbále. Enhōb aá,

¹⁶ “Sánḡwéeé ahóbé aá

‘Mmén melě mós syāābōō sémwēē
 á pónđé echě ehúe’ á’sō.
 Měběl bėbíí échēm mbéndé,
 m̄b̄el-le ngáne bėechatėnné chó mbėd.’ ”

17 Anhób ámpē aá,

“Mėekamtėn-naá mbėb
 ne mewusé m̄m̄āb ámpē.”

18 Dyōb áamáá bad mbėb alagsen. Mendε ké
 mehóg méesaá ámpē m̄me bad bėtąngéné abε
 ākud alagsen dé mbėb.

Syánē dépe benben ne Dyōb

19 Né-ōó, a-baányan dewóó kunze āsól áđé abwóg
 á Hōm áde Atómtėné Asán. 20 Yesuε ad̄ibnéđé
 syánē nzii e ekóólé echě epεene’ alongé abε áde
 ábágé eche yāl. Eche yāl edé n̄ngáne abad áde
 dénkān syánē āpe wée Dyōb ádíí. 21 Syánē dewóó
 ndāle e prisε awě anone’ bad bé Ndáb e Dyōb.
 22 Né-ōó, syánē dėsíde benben ne Dyōb ne nlém
 nhóg, dėsúm-me nlém r̄syāāl áwē. Nén áde áyāle
 mekií m̄me Yesuε ásyógé á awog, mėbélé nlém
 r̄kénlé syánē á abum, awōbpé-’ε syánē ne mendíb
 m̄me mėsáá áte. 23 Déwéd adúbe áde dedúbpe
 achāned, dėsúm-me nlém áhed, áyāle dedúbpe
 nén bán Dyōb áde ábele dyam áde áhóbé aá
 m̄ōběl, éche ehób éhūnēē á ndōob. 24 Dėnən
 ngáne déhele dewéd nhóg ne aníníí nlém á abum,
 āb̄el dēdān dēbele-’ε mekan mé bwām. 25 Deebág
 bán deébōmēē pónđé ésyāāl ngáne donge á bad
 bėbεlé. Boŋ pen débê déwéde’ nhóg ne aníníí
 nlém á abum, tange bōob áde nyényínéé bán Epun
 éche Sāngwéeé ápeé édé benben.

26 Nzé dedíi dekoos' mekan mé mbébb abel áde démáá mbále abíi, né mende ké mehóg méesaá ámpē míme méhūd míme mbébb. 27 Bon nzé mod adíi akoo' mbébb abel, né mbwóg mós mébbé mós áte nén áá Dyöb dékwid mós nkáá é Epun é Nkáásé. Béhyāād mós á ebonde é muú é ngíne échē éhyāād bad ábe bétāngan Dyöb. 28 Kénzée awē eehíde' mbéndé eche Mosē, bon bad bébe ké' béléán bēbíd mbón nén bán eehíde' mbéndé, bēbélé bēwúú mós, bēwōgē-é mós ngol. 29 Nzé mod-te eetēde Mwān a Dyöb nēe dyam, eetēde mekií mé melē mé Dyöb míme mébélé bon asān nēe dyam, ásyāē-é káāne Edāádān eche epeene nsimé, né chán nkógsen míme ene ndín e mod níhele mbé? 30 Debíi mod awē anhób áá, "Mékōgsen bad. Mētimtén bó áyāle mbébb míme bēbélé." Anhób-pe ámpē áá, "Sāngwēé ákāād ábē bad." 31 Edé ebébtéd ne kénzée awē ahúné á mekáá mé Dyöb dé alongé ákud nkógsen.

32 Bon nyēchatán ngáne nyémbē-sē á mbooted áde nyékúde e'nyínen bé ekide. Ene pónde, kénēe nyēnkudté metake mé ngíne, nyēnkan nlem. 33 Pónde ebédé échē bad bēwógté'áá nyé e'són á'sō é' bad, bētagté-é nyé. Donge á pónde ámpē nyēbágé'áá ne bad ábe békúde échē ndín é metake. 34 Nyēwēnnádtáá bad ábe bēmbē á mbwōg. Ké áde bēndummé nyé bwēm, nyēmbé nyēbé menyinge, áyāle nyēmbíi nén bán nyēwóo bwēm ábe é'tómé nē ábe bēbbé abé ne abé. 35 Né-ō, nyēbbē nyēwēd nlem á abum, áyāle nén Dyöb ábage nyé nsábe míme níhábé ámin. 36 Nyētāngéné awesen ábel nén nyébel ngáne Dyöb áhedé, nyékud-te chōm éche Dyöb áhóbé áá móbbē

nyé. ³⁷ Eténlédé á kálag e Dyöb nén bán,
 “Mwämpin mí pónidé,
 mod awě atónjéné aπe, äpě,
 éebébed-taá pónidé.

³⁸ Abêm bad ábe bébele mekan míme métónjéné
 bēbē á alongé áyāle bédúbpé abêm e’yale.
 Bon pen kénzée awě atimné mbíd,
 méewógénné mó menyinje.”

³⁹ Syánē pen deesaá nyaa é bad éche étimén mbíd
 ébós-’ε. Dēdīi bad ábe bédúbpé Dyöb, békúdé-’ε
 e’sósoŋ.

11

Adúbe

¹ Adúbe ádíi áwóŋ nlém wεé mósókūd chöm éche
 mósúmé nlém áyāl. Amad nén wεé chöm éche
 mósnyinnēē dīd ékóó abé. ² Adúbe áde bad bé’
 bósód béndūbēē Dyöb dós dēnkāŋ bon Dyöb abéen
 bós menyinje.

³ Adúbe dós ákás bon desóŋtén nén bán eyale é
 nsəl chós Dyöb áhagné nkōŋsé. Né-ós, bwēm ábe
 dényinnēé dīd é’húú ne chöm éche déenyinnēē dīd.

⁴ Adúbe dós dēnkāŋ bon Abεε ábe Dyöb mende
 mé bwām míme méntōm míme Keenε ámbéé
 Dyöb. Adē adúbe dós dēmbēl bon Dyöb abéen
 mó menyinje née mod awě abele mekan míme
 métónjéné. Nén dénnynēd ne akob áde Dyöb
 dēnkobpé mende míme Abεε. Adúbe dós-’aá ákás
 bon, kénée ámáá awé, abé álāŋgē bad mam.

⁵ Adúbe áde Enεge dós dēnkāŋ bon eenyinne’
 kwéed dīd. Bon pen Dyöb dēnkēén mó ámīn,
 bēnkēnyīn-naá mó ámpē. Eténlédé nén bán,
 byánán Dyöb dékēén mó ámīn, abelé’áá mekan

míme méwógté'áá Dyöb menyinje. ⁶ Modmod eéhlēē-se awógéd Dyöb menyinje áde éedúbréé Dyöb. Nén ádé áyāle kénzéé awě ahede ape benben ne Dyöb, atāngéné adúbe nén aá Dyöb ádé, adúbe-ε aá Dyöb désābē bad ábe béhede mó abíi.

⁷ Adúbe dōō dēnkāḡ boḡ Noa awógén Dyöb áde Dyöb dénlāā'é mó mam míme mébenléd á'sō é' pón dé. Kénéé édíi bán pón dé eched enkēnyínénné míme mekan díd, ambēl ngáne Dyöb dénlāā'é mó. Anlōḡ bāle é'mbáám bāa. Áwēd-te dōō bōōbe ádē abum á ndáb bénsānlē békūd-te e'soosōḡ áde mendíb ménlōnnē nkōḡsé áte rísyāal boḡ chōm ésyāal éhó. Abel áde Noa ámbenlé nē, dénlūmēd bán mbeltéd ní bad bé nkōḡsé rídé mbéb. Adúbe pen áde Noa ánwōḡgē dēmbēl Dyöb déntēd mó nēe mod awě abele mekan míme métāḡgéné.

⁸ Adúbe dōō dēnkāḡ boḡ Abrahamε awógén Dyöb áde Dyöb dénlāā'é mó aá áhide á dyad wēe ábédé, áke hōm démpēe á mbwóg eche Dyöb dēmbōḡsénne mó abe. Anwógén Dyöb ákē-ε, kénéé énkēmbíí'é wēe ákagké. ⁹ Adúbe dōō dēnkāḡ boḡ áke ádyēē á mbwóg echē Dyöb dénlāā'é mó aá móhōbē móō móōbe mó. Ambé áwed nēe nken. Aisigε bó Jakōb bōmpē bēdyéé'áá á e'bem-tē. Dyöb dénlāā bōmpē melemlēm ngáne ánlāā'é Abrahamε. ¹⁰ Abrahamε adyēé'áá á e'bem-tē wē á sine' pón dé eche ádyēé' á dyad ámbāá áde ásumnéde, áde Dyöb dēn átíidē boḡ alōḡ-ε. ¹¹ Adúbe dōō dēnkāḡ boḡ Seraa abé nkog kénéé ámmadté kōd e achád atóm. Andúbé nē áyāle andúbé aá, nzé Dyöb áhóbé aá móōbēl dyam, abelé alóned dō. ¹² Né-ōō, kénéé Abrahamε ámmadté achun bwāmbwam nyaa echē éhele'áá-se achyáá

mwän, nchyaátén rísyāāl ménhūū ne mós. Mmê nchyaátén mēmbuú áte nēngáne betintine ábe bédé ámin, ríbūū-’ε áte nēngáne nsíí míme rídé á nkag mé edíb é nkwě, míme béehéé-εe bétónj.

¹³ Abê bad bé’ bōód, bēnwōj adúbe káōjne á kwééd. Kénéε bēn bēnkēnkudté chōm éche Dyōb dénlāā’έ bó aá móhōbē móō móōbe bó, boj bēnyīn ábē bwēm nchabnede bēwógén-εe bó menyīnge. Bēnkēmbáŋ-gaá ahób bán bédii beken ábe béewóo hōm áde bēdyεε’έ á nkōjse-te. ¹⁴ Bad ábe bēhóbe échē ndín é mekan bēlūmte nēn bán bēhede hōm áde bēchōgké ádāb. ¹⁵ Nzé bédii bēkám tánnáá wéε bēmbīdtē, né bēnhēd nzii átim ámbīd. ¹⁶ Boj bēntīm bēhede dásō mbwóg éche eboó, nédē mbwóg e ekombe é mīn. Né-ōó, Dyōb déēkwāgnēē bó nzé bēchógé mó bán ádāb Dyōb, áyāle amaá bó echab mbwóg abojsen.

¹⁷ Kénéε édii nēn bán Abrahame móō Dyōb dénlāā’έ aá bán bēbuú mó áte, adúbe dōō denkōj boj abé mbojsén ábe Aisige awě abédé mímē mpom mí mwän néε mende áde Dyōb ákágé mó. ¹⁸ Aisige móō Dyōb dénlāā’έ Abrahame aá, “Mbwεεn ne Aisige dōō ncháátén míme rílánjé wε meé wěkūd mébīdtē.” ¹⁹ Abrahame andúbé aá Dyōb áwóó ngíne ápuud ké mod awě amaá awé. Né-ōó, dehele dehób bán Abrahame ankūd Aisige ámbīd áde ápúúdé. ²⁰ Adúbe dōō dēnkōj boj Aisige ahób aá Jakōbe bó Esao békūd nnam pónde éche ehúε’ á’sō. ²¹ Ade Jakōbe ádíí bēnben ne kwééd adúbe dōō dēnkōj boj ánāmēd mwän-téé awě Josebe. Anwúlén á ntónj míme átōmneé, ábe Dyōb edúbé. ²² Ade Josebe ádíí bēnben ne kwééd, adúbe dōō dēnkōj boj ahób á’sō é’ pónde aá bad

bé Israel bébīd á Egipto. Dó-'áá dēnkǎḡ boḡ alógtén ngáne bétǎḡgéné mīmē ndim abel.

²³ Adúbe dǒo dēnkǎḡ boḡ Mosεε sáá bó nyan békōō mó á etún é ngǎn éláán áde bémáá mó achyáa. Bénnyīn nén bán Mosεε aboó elóon bwāmbwam, bēnkēmbán-gaá ábóo mbéndé éche kǎḡ éntōmēdtē.* ²⁴ Adúbe dǒo dēnkǎḡ boḡ áde Mosεε áamá akwǎg, enkēnkwentén áá béchǎge mó bán mwǎn awě mwǎn a mmwaád awe kǎḡ e Egipto. ²⁵ Ankwentén ákud metake ne bad bé Israel tómaa áwóg bwám á mbeltéd mé mbéb-te á esǎḡ é pǒndé. ²⁶ Ne mó, annyīn nén áá ákud akwǎgké á nló míme Ane-awě-Bésinéé, áde nsábe míme rítómé nhǎn ní Egipto rísyāāl. Ambel nē áyǎle asiné'áá nsábe míme Dyǒb débéé mó á pǒndé eché ehúé'.

²⁷ Adúbe dǒo dēnkǎḡ boḡ Mosεε áhīdē á Egipto ésebán abáa' meliḡá míme kǎḡ e Egipto. Ankan nlem abé áke nēḡgáne mod awě anyíne Dyǒb áde mod éēnyinnēē dīd. ²⁸ Adúbe dǒo dēnkǎḡ boḡ atíi Ngande e Nnyíme-ámīn. Anláá bad áá bémwagted mekií á mmwε mé e'kob ábel boḡ nzé ángel e Dyǒb epedé áwúu bán bé'sō, eewúé' bán bé'sō bé bad bé Israel.

²⁹ Adúbe dǒo dēnkǎḡ boḡ bad bé Israel béchābē edīb é nkwě éche béchǎgεé bán Edīb é nkwě éche Eyǎge'. Bēnchabé chǒ byánán békag á ndǎob mín. Boḡ áde bad bé Egipto béhóbé bán bǒmpē béchabe, bēnhō. ³⁰ Adúbe á bad bé Israel dǒo dēnkǎḡ boḡ e'ké ábe bēnlǎḡnéd dyad á Jeriko é'kwē

* **11:23** Kǎḡ e Egipto entóméd mbéndé áá béwúu bán bé baachóm bésyāāl ábe béchyáá ekóólé ábe bédé mwě níbe átímé áse.

áde bad bé Israel béhyômnédé bó epun saámbé.
³¹ Adúbe dóo dênkəŋ boŋ akwalεε awè béchágé'áá bán Rahabε enkênwé áde bad ábe bénwūēn Dyöb nló áte bénwēē. Nén dēmbεnléd áyāle anköb bad bé Israel nken áwe ndáb, áde bélómé bó áhyε dé anən dyad áte á mesəəm-tê.

³² Mbê níkag á'sō-yε? Póndé eésaá echě níhele nláá nyé mam áyāle bad nēŋgáne Gidionε, Baragε, Saamsinε, Jeftaa, Dabidε, Samwεε ne bekal bé edəádəŋ bésyāāl? ³³ Adúbe áde ábê bad dóo dênkəŋ boŋ bétóm meloŋ áte níme bóbōo bēnwän bel. Bélyágté'áá bad ábe bēbédé ásē echáb nyaa echě etəŋgéné. Bēnkūd-tε bwēm ábe Dyöb dénhöbpē áá móōbε bó. Bēnkəŋ nsəl ní ngii. ³⁴ Béndimēd e'bonde é' muú. Bémbid á mekáá mé bad ábe bēhédé'áá bó páá awūen. Kénéε á mbooted bēnkēnwōŋgé ngíne boŋ Dyöb dēmbě bó ngíne, bēbédéε sánze é ngíne bēwanne' sánze é meloŋ mémpēe, éche sánze étōmē' mehélé. ³⁵ Adúbe dóo dênkəŋ boŋ doŋge dé bebaád ányín néε ábāb bad ábe bēmmād awé bétímé ámbīd á alongé.

Doŋge á bad pen bēnkūd mbéte káəŋ bēwé. Bēnkēnkwenténne Dyöb abāŋ á yāl ábel bétéde bó. Bēmbel nē áyāle bémbíi bán bēpuú békūd alongé áde ádé bwām tómaa dé nköŋsé. ³⁶ Doŋge démpēe dēnkūd metake, awel áde bad bēwéláá bó, bēbōmé-'ε bó. Bēnhəŋ doŋge bēhé-'ε bó á mbwəg. ³⁷ Doŋge ábédé áde bēnwūēnnē meláá, bēmpēe-'ε bésél bó áte e'sōŋ é'be. Bēnwūēn bēmpēe páá. Abē bad bēwáá'áá e'kob é'mbód béhyōmne'. Bēbédéε betóótōkē bé bad, békudé' metake, békudé-'ε ndu-tul á mekáá mé bad bé ekəyí. ³⁸ Eehədnád-taá bán bad bé bwām néε bó bēbê á nköŋsé mé mbéb wén.

Bétámnádtáá á ehyánge ne á mbɔɔd m̄n, bédyεé' á e'láá-tê ne á e'lôm-tê.

³⁹ Adúbe áde ábê bad bésyāāl dēnkāḡ Dyōb ábéén bó menyinḡe. Boḡ ké nê, bēnkēnkudté chōm eche Dyōb dénhōbpē aá mósḡbē ábē bad. ⁴⁰ Nén démbē áyāle Dyōb dēmmad atíi aá mósḡbē syānē chōm échē étómé chōm éche ánhōbpē aá mósḡbe bó. Antíi nén aá, nchoo ne syānē dáo ábê bad békwoḡnédté áwe e'só.

12

Dyōb dáo áde syānē Sáá

¹ Ngáne édíi-'aá bán enén ndun e mod elāḡnéde syānē edé-'ε mbōḡ, tāḡḡene adúbe áde déwóó, detāḡḡéné desidéd kéchéé éche ékáā syānē nzii á nkāḡ, détedē-'ε mbéb míme níháá syānē. Detāḡḡéné néε dékáá nlém ānyāged mehélé míme Dyōb áhóbé aá dényāged. ² Detāḡḡéné néε désúmé m̄d wēε Yesuε mwēn, áyāle mó alyāḡte syānē áwōḡ adúbe. Mwēn-naá áwōḡḡēn syānē kááḡ dépid-te dó á asóg. Ankwentén áwé kwééd e e'sōn á awōḡ, enkéntéd-taá áde akwāḡké néε dyam ábel nén ákud menyinḡe míme Dyōb ákōḡnéde mó. Nê ábélé-'ε bɔɔb, adyεé á ekáá é mbáá á atíi dé nkamlēn á Dyōb.

³ Nyékamten ngáne Yesuε ānkwenténné metake akud á mekáá mé bad bé mbéb ábe bēnkáó mó. Nyékamten míme metake ábel boḡ nyéekómé', nyéédūlē-'ε mekuu ámbíd. ⁴ Nzum eche nyéwanéé ábóded mbéb, eépédéé ndāḡke eche nló m̄mēn níhele ítóm. ⁵ Nyéēchatán e'yale ábe Dyōb dēmbēnlédté áwéd nyé nlém á abum, achāḡ áde ānchāḡké nyé aá ábe bán. Anhób aá,

“A-mwän, nzé Dyöb ákánné wε áte áyāle mbéb
 míme ébélé,

etéd mímé nkáne áte néε dyam dën.

Nzé Dyöb ákógséné wε, yǎl eehóó' wε áte.

⁶ Bíí nén wεé mod awě Dyöb ádáá, móo ákânneé áte.

Mod awě átédé néε awe mwän, móo ákógsanné.”

⁷ Né-óó nyéwεsen mímé nkógsen áyāle nén, rílúmte
 nén bán Dyöb átédé nyé néε ábe bán. Mwän ahéé
 adé awě sáá éékógsānnē áyāle awusé áde ábélé?

⁸ Nzé nyéékūdē nkógsen áyāle mbéb míme nyébélé
 ngáne bán bé Dyöb bésyāal békudεé, né nê álúmte'
 nén bán nyéékoo'ε bán bé Dyöb abé. Né nyédii

bán ábe béchyáá á asón. ⁹ Nzé ábēd besáá bé
 nkōjsé béhele békógsēn syánē áyāle mbéb míme
 débélé, débagé-'ε bó edúbé, né detāngéné Sáá awēd
 awě adé ámín edúbé abε tómaa nê, ábel débê á
 alongé. ¹⁰ A esón é pónde dáo ábēd besáá bé nkōjsé

békógsanné syánē, kéchán áde ébóηnéde'-ε bó dáo
 bébelεé. Dyöb pen ákógsan syánē áwóηgen syánē
 ábel nén débê bad ábe besáá ngáne mwën ámpē
 ásáá. ¹¹ A pónde eche dékúdē nkógsen, dewóge
 mbéb áte, deewógéé bwám. Bon ámbíd e pónde,
 kénzée awě mímé nkógsen ní'yágté debyée, abelé abé
 nsan, ábelé-'ε mekan míme métāngéné.

¹² Né-óó, mekáá míme mēmmad nyé achii áte,
 nyéwéd mó áte. Nyéēmwāg-kε σε mekuu mésāgē
 nyé ásē. ¹³ Nyébê nyéhídé' nzii echē etyéémé ábel
 nén bad ábe bésyāgte', béenabpé eped atim, bon
 bédyεε bwám.

Elébé áwógen Dyöb

¹⁴ Nyéwan áte ábé nsan ne moosyáal. Nyéwan-
 ne áte ámpē áwóη abé áde ásáá, áyāle ésebán

mod asáá, eéhēlēē-se anyín Sánḡwéé. ¹⁵ Nyényín nén bán nyé modmod nyéebóó é nsimé ní Dyöb akud. Nyényín-ne nén bán nyé modmod nyéesaá nēḡgáne mbál mé mbéb míme nzé níkwógé mbélé níḡēēn ndutul, mbébed-te mbál mémpēe. ¹⁶ Nyényín-ne nén bán nyéekábéé mesón, nyéébélé-’ε mam née bad ábe béēwōḡne Dyöb pónde ḡgáne Esao ámbenlé. Esao ansóm kunze echē ánwōḡgē née mwān a’só á etútú é ebwōḡ é ndyééd ehóg. ¹⁷ Nyébíí nén bán, ámbíd e nê, Esao ahedé’áá aá sáá ánamed mós, boḡ sáá ambāḡ mós anamed. Kénéε ánchíí’é bwāmbwam, nzii enkēnbáá áhəḡḡen dyaḡ áde dēmbenléd.

¹⁸ Nyékamtēn nén bán hōm áde nyétyéémé bōōb ádíí a’só é’ Dyöb. Nyéetyéeméé nēḡgáne bad bé Israel béntyēēmmē benben ne mbōōd e Sinai e nkōḡsé echē muú ní ḡḡíne mbíde’áá ámín. Adé béntyēēmmē áhed, ḡḡḡen e ehíntén embé áhed, bín é’sūdēn áte, ekukud é ḡḡíne-’ε étōme’.

¹⁹ Bénwōḡ esaád é elon, béwōḡ-ke ehób. Mbwōḡ ní ḡḡíne ménkōb bós. Bénchāḡ Dyöb nén bán eehóbé’ ámpē. ²⁰ Bénchāḡ Dyöb nê, áyāle dyaḡ áde ánlāā’é bós aá bébel dénwōḡēd bós mbwōḡ bwāmbwam. Anhób aá, “Chōmchōm éekidatán enén mbōōd. Nzé ké nyam ekidténe chós, bélúm chós meláá káōḡ ewé.”

²¹ Mekan mímé bēnnyínnē ménkōbēd bós mbwōḡ bwāmbwam. Mbwōḡ ménkōb káōḡne Moseε. Anhób aá, “Mbwōḡ ínəḡte με.” ²² Boḡ nyépen, nyépedé benben ne mbōōd e Zayōn. Nyépedé bōōb á dyad áde Dyöb dé alonḡé. Adé dyad ádíí Jerusalem awē adé ámín. Awēd-te, áḡel bííb, éládné áte ne menyḡḡe. ²³ Nyémpē nyépedé á nlatén mí bán bé’só bé Dyöb ábe Dyöb átélé mīn

ádyōb. Nyêpedé wéε Dyōb áde ákáadte' moosyāál. Nyêpedé áfínté e e'dáádəŋ ábe bad bé bwám ábe Dyōb ábélé békwoǵnéde. ²⁴ Nyêpedé wéε Yesue awě adé mod atínté a bad ne Dyōb á melě mékōlē. Nyêpedé bəəb wéε Yesue ámwáǵtéde nyé nímē mekií. Mmē mekií mébáǵé syánē nsimé tómaa mekií níme Abεε.*

²⁵ Nyényín nén bán nyéekōnléé Dyōb metúu tŋgεne dyam áde álŋgεé nyé. Bad ábe bénkēnwóǵén mod awě Dyōb dēmbanée á nkōŋsēte áléb bad, bēnkūd nkóǵsεn. Ngáne bēnkudté nkóǵsεn, syánē ámpē detŋgéné nkóǵsεn akud nzé deewóǵe elébé éche ébídé ádyōb. ²⁶ Bəəd áde ánhəbpē akan, nkōŋsē ménsāǵnéd ásē. Bəəb-pe ahóbé nén aá, “Măběl nkōŋsē nsāǵnéd ámpē. Saá-kaá nkōŋsē mwēmpεn mēsāǵnéd, məběl káŋne ekombe é mŋn chómpē ésāǵnéd.” ²⁷ Ahób áde ahóbé aá, “Ampē” álúmte' syánē nén bán Dyōb déhūd bwēm ésyāál ábe bésāǵnéd ásē. Abé bwēm é'díi bwēm ábe áhǵé. Aběl nê ábεl boŋ bwēm ábe béesāǵnéd é'lyəǵ.

²⁸ Né-əó, désāǵnεn Dyōb áyāle nén abagé syánē mbwóǵ echě mod éhεléé-se aságéd ásē. Désāǵnεn Dyōb, débage-'ε mó edúbé nyaa echě éwōǵéd mó menyinǵe. Débele-'ε nê ne mbwóǵ ne edúbé ésyāál. ²⁹ Ne mbále, Dyōb ádēd ádíi néε muú níme níhyāŋte chōm ésyāál.

13

Abé áde áwóǵte Dyōb menyinǵe

* **12:24** Mekii níme Abεε méhede' metuuten, boŋ mekií níme Yesue mépεεne dásō alagsen.

¹ Edəŋge é Bad bé Krīsto ébê ékag á'sō áfintê echên. ² Nyéebág bán nyéekobεé bad beken pón dé ésyāāl. Doŋge á bad békékōb ángel nken, áde béebí' é bán ángel chōó édé. ³ Nyékamten bad ábe bédé á mbwōg. Ebê byánán nyáābōō nyêdé áwed. Nyékamtan-nε bad ábe békude metake ásē e bad bémpēe. Ebê byánán nyémpē nyékude' mímê metake.

⁴ Mod-téé awē adé á ndáb e'wōŋgé ábage e'wōŋgé edúbé. Mod eekábé mesón á ebwōg. Nyéechatán nén bán Dyōb dékāād bad ábe bébele' e'toŋgé é' mekan ne ábe békábe mesón.

⁵ Nyéēsūmē nlém áyāle edəŋge é mōné, nyébé-'ε menyinŋe ne kéchéé éche nyéwóó áyāle nén Dyōb áhóbé aá, “Méechenéeé nyé mbêd, méebán-'aá nyé áyāl.” ⁶ Né-ōó, dehele dehób ne nlém n̄syāāl nén bán,

“Dyōb dōó adé nwōŋgene awēm,
méebánŋé dyamdyam,
cheé moonyon áhele ábēl mε?”

⁷ Nyékamten bad ábe bélyágté'áá nyé bōód, ábe bēnkálé nyé eyale é Dyōb. Nyényín nsón míme abé ádāb ábélé. Nyéhíd mímāb mekuu, nyédúbe ngáne bōmpē béndūbēē. ⁸ Yesu Krīstəə adé melemlem pón dé ésyāāl. Ngáne ámbēē chān, nê dōó ádíí chii, nê dō-'aá ábēē abé ne abé. ⁹ Nyéēm wāg-se ayáge ké áhéé áde áde nhəŋlén áhəŋlén nyé nlém á abum. Ebóó nén bán nsimé ní Dyōb múmó n̄wéde nyé áte saké mbéndé t̄ŋgene adyé dé medyé. Echê mbéndé éewōŋgannē bad ábe béhíde chōó.

¹⁰ Dewóó menyán mé mende míme beprise ábe bébage mende á ebem é Dyōb béewóó'ε kunze ádyé chōm áhed. ¹¹ Prise ambáám bāa, abage Dyōb

mende áyāle mbéb mí bad. Abelé atéd mekií mé nyam é mende asólén mó á Hõm áde Atómténé Asán. Bébélé bétéd ndim ní nyam pen, bébidén ámbíd e eyáde béhyáád mó. ¹² Nê dõó dênkǎḥ boḥ Yesue ámpē átag, awé ámbíd e e'ké é' dyad ábel boḥ nímē mekií mébel bad bésân. ¹³ Né-óó syánē ámpē déke détân mó ámbíd e eyáde ábel boḥ syánē ámpē dékud e'sôn ábe ánkudté. ¹⁴ Déke détân mó áhed áyāle nén deewóó'é dyad áde ásúmnédé á nkõḥsé-te wén. Boḥ desumé nlém ábé á dyad áde áhúe' á'sõ. ¹⁵ Né-óó, débê dékene Dyõb mbwiined ne Yesue. Mmēd mekenag mébê nêḥgáne mende níme débageé Dyõb. Dékag dékale' nén bán móó adé Sǎḥgwéé. ¹⁶ Nyéechatán nén bán, nyétǎḥgéné bwâm ábel wéé bad bémpeé. Kéchéé éche mod áwóó-'aá, áwõḥgan nhóg ne aníní. Echê ndín é mende chóó éwõgte Dyõb menyinge.

¹⁷ Nyéwõgne bad ábe bélyǎgte nyé, nyésuded-te yǎl ásē e nkamlen nímāb áyāle bóó bènõne nyé. Bétyēem-me á'sõ é' Dyõb áláa mó ngáne bénóné'áá nyé. Nyéwõgne bó ábel boḥ bébê menyinge ânõn nyé. Esehé nê, né béwõg ndutul ânõn nyé. Né nê déewõḥgén-naá nyé.

¹⁸ Nyékánnad sé. Sêbíí nén bán nlém níkenlé sé á abum áyāle chõm ésyāāl éche sébélé. Sêhedé'áá bán sébel chõm ésyāāl nyaa echê etǎḥgéné. ¹⁹ Mbáde nyé achán nén meé nyékánnad sé ábel nén Dyõb ábel níwámsen atim ámbíd ábé ne nyé ámpē.

Mekáne mé asóg

²⁰ Dyõb dõó ábage' bad nsaḥ, dõ-'aá ápúúdté Yesue, Sǎḥgwéé awêd. Bõob-põó, Yesue adii nêe

ndəle a Nnən-a-mbód awě bėbėnlėdė nīmė mekií
 əbel nchemtən mbê á ngíndė ne á ngíndė, átíntė
 e Dyöb, ne éche mbód. ²¹ Nkənne nén meé,
 Dyöb əbel nyėbê mboŋsén əbel chöm-tė éche
 əhedéé aá nyėbel, nyėbé-'e nyóŋgé əbel mam nıme
 métəŋgénė. Yesuə əwöŋgan nyé əbel mam nıme
 méwógte Dyöb menyıŋge. Ehúmé ebê ne Yesu
 Krıstəə abé ne abé. Ebê nê.

E'yale bé asóg

²² A-bənned, ncháa nyé meé, nyékon əchén elėbé
 awóg. Enén kálag echě rıténlé nyé eéchabéé áte.

²³ Ndəó meé nyėbíi nén bán bėbídtė mwənyəŋ
 awêd, Timotiə, á mbwəg. Nzé awámsénė me atán,
 né súmō séēpě əwēn.

²⁴ Nyélentėd me bad əbe bėlyágte nyé bėsyāəl,
 nyéleled-tə bad bé Dyöb bėsyāəl. Bad bé Dyöb
 bėmpēe əbe bėbídíe á Italia, bómpē bėlómme nyé
 melentən.

²⁵ Nsimé ní Dyöb mbê ne nyé moosyāəl. Ebê nê.

Mel̃ Mékōōlē
New Testament in Akoose (CM:bss:Akoose)

copyright © 2011 Wycliffe Bible Translators, Inc.

Language: Akoose

Translation by: Wycliffe Bible Translators, Inc.

Akoose

bss

Cameroon

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Akoose

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 21 Feb 2024 from source files dated 29 Jan 2022

0143729f-907e-5098-b6ce-63b1629b8e48